

編號 1 號

【帶阿婆去公園寮】李秀鳳原作

阿婆平常時同滿叔歸家人歇在鄉下，放寮日，佢會來佢屋下看佢同老妹有過高無？有過大無？阿婆來个時節，佢同老妹會牽等厥手，帶佢去屋脣个公園寮。

這日，佢等三子阿婆手牽手又來到公園，一叢一叢開啊一等鬧熱个櫻花相爭展分人看靚，一群青絲仔停在櫻花樹頂啾啾滾迎等人客。早春个風吹過來，雖然涼性涼性，毋過，好得有燒暖个日頭花晟啊人歸身鬆爽。

公園肚裡个細陂塘，有畜盡多紅金鯉，還有幾隻肥卒卒仔个鴨仔泗來泗去。「阿婆、阿哥，共快來看。」先走到陂塘脣个老妹幹頭大嫲聲喊。佢牽等阿婆行兼去，看著一隻細老鼠緊拚拚仔泗過來，同一大群紅金鯉、鴨仔搶食麵包，還生趣唷！脣口企等个大人細子，大家都看啊嘴勺勺仔。阿婆噓啊嘴合毋拏，講佢食到七十歲，還毋識看過老鼠仔泗水泗恁遽。阿婆教佢同老妹唸：「阿貓牯，出門打老鼠，老鼠跌落陂塘肚。拿來煮，全家食落肚，翻床拖蓆¹肚筍痛啊！何麼死苦！」

行療个阿婆，坐在涼亭下个石凳項轉擺，看佢同老妹擱等本來愛餵魚仔个麵包，扯一細坭、一細坭擲啊地泥下，黏時錫來七、八隻對樹頂颯下來絡食个大尾鼠。大尾鼠蓋圖嘍，毋驚人，還會行前來同老妹討食。阿婆看啊笑弛弛仔，過路人乜頓腳看啊呆呆。

拓拓風，老妹「哇」一聲，講「有蛇哥」，瀉啊涼亭項捕等阿婆个肚筍，驚啊歸身緊顫。佢過大膽，行啊樹頭下看真啊，大聲噓講：「該毋係蛇哥啦！係山狗太。」阿婆牽等老妹行過來，看該山狗太緊領頭，親像同佢等相借問。阿婆教佢兩姊妹唸：「山狗太，恁作怪，看著人，領領拜，總有一日，分佢扭著，一片滷鹽一片晒。」

佢問阿婆：「你斷真愛同山狗太扭去滷鹽晒日頭？」阿婆緊掌佢个頭那緊講：「戇孫仔正得！童謠為著湊句又押韻，成時會加一息生趣个字眼來餵細人仔啦！」

佢同老妹最好帶阿婆來公園寮，毋單淨好搞，還做得聽阿婆講古、學唸生趣个客家童謠，三子阿婆輒常寮啊毋想歸屋。

¹ 翻床拖蓆：音 pan' cong' ia' qiaq；形容非常痛苦的狀態。

編號 2 號

【學騎車】鄒瑞梅原作

在佢讀小學一年生個時節，阿爸輒常用自轉車載佢去學校讀書。上崎個時節，阿爸係大粒汗細粒汗踏啊啟氣毋轉；下崎個時節，就溜一路下。路個兩片種歸排個竹仔，還有一頭梔仔花，風吹啊過來，該梔仔花個清香，到今佢還記啊清清楚楚。

佢蓋好坐在後斗，聽阿爸講天說地。阿爸不時教佢做人個道理，佢講：「大人毋講古，細人仔毋知寶。」兩子爺一路唱歌唸曲、啦歌哩曲，還有三字經同弟子規也係坐在後架仔頂頂讀會個。

到佢讀三年生個時節，想愛騎自轉車，就拜託阿爸教佢。阿爸同自轉車牽啊大禾埕，拿一支擔竿縳啊後架仔頂頂，佢講恁呢車仔橫下來個時節，就毋會分車仔礮著。阿爸扭等後架仔分佢坐穩來，再教佢兩隻腳踏在腳踏仔頂頂，煞力牯箭，車仔就會行了。佢個心肝頭像「十五個吊桶打水——七上八下」蓋緊張呢！阿爸在脣口同佢做膽，阿爸講：「『知得孔竅，打得鬼噉。』過細義兜仔，毋使驚，阿爸在後背同你搵手。」

佢蓋煞猛練習，無轉擺。大禾埕緊來緊鬧熱，阿哥、阿姊、

老弟、老妹還有隔壁個阿明、阿秀總概走過來同佢加油；連阿明畜個狗仔也跔等佢個車仔後背迂來迂去。恁多人在這看佢騎車仔，做毋得漏氣¹哦！橫倒就蓋無面子，阿明一定會去學校播瀉、講分同學來噓佢。

為著毋分阿明同同學噓，佢盡命牯練習。哈哈哈哈哈！毋使一點鐘，佢就曉得騎了。阿爸同佢講：「還壁哦！毋聲就毋聲，一聲就打爛盞。」阿爸話正講出嘴，手一放，車仔就橫下來了，正經還見笑哦！賺痛個，手巴掌、膝頭都搓溜皮了，還痛哦！痛啊佢目汁濫汨。

大家都無噓佢，還行前來關心佢有仰仔無？阿明問佢還愛練無？正經係加講個，「趕燒趕熱」哪有毋練個道理？阿爸看佢恁增志，再一擺扭等後架仔，分佢騎上自轉車，佢盡命牯箭，練啊汗流脈落，這擺正式曉得騎了！佢一等暢個同阿爸講，等佢大了，一定愛用這臺自轉車載阿爸一哪去寮。阿爸同大家企在禾埕脣，噓啊牙射射仔。

¹ 漏氣：音 lau kui / lau kui`；丟臉。